

皖省志略

永清朱雲錦輯

卷四目錄

廣德州

建平縣

滁州

全椒縣
來安縣

和州

含山縣

六安州

英山縣
霍山縣

泗州

盱眙縣
五河縣

天長縣

皖省志畧

目錄

廣德州

州于天文爲斗牛分野星紀之次在禹貢爲揚州之域春秋時吳桐汭地漢爲丹陽郡故鄣縣地後漢末分置廣德縣仍屬丹陽郡晉屬宣城郡劉宋因之齊時嘗爲郡治梁紹泰元年析置石封縣兼置廣梁郡陳永定二年改陳畱郡隋平陳郡廢省廣德縣改石封曰綏安屬宣城縣唐武德三年於縣置桃州七年州廢屬宣州至德二載復改綏安縣曰廣德五代南唐保大八年置廣德制置司宋太平興國四年置廣德軍屬江南東路元至元十四年升爲廣德路屬浙江行省明初爲廣德府改縣曰廣陽洪武四年改府爲州十三年以州治廣陽縣省入直隸南京

本朝屬安徽省領縣一曰建平州治在省治東南三百里東西距一百三十里南北距一百六十里東至浙江湖州府長興縣界三十里西至寧國府宣城縣界一百里南至寧國府寧國縣界九十里北至江蘇常州府荆溪縣界七十里本州界東西距七十五里南北距一百六十里東至長興縣界三十里西至建平縣界四十五

里南至寧國縣界九十里北至荆溪縣界七十里由州治至京二千七百八十里明洪武初元帥趙繼祖邵榮鎮始建城垣周八里有奇門六池深八丈濶一丈六尺嘉靖中始甃以磚正德後屢修屢圯

本朝康熙二年重修州居吳之西陲界浙藩接秣陵控具區交錯于宣歙之間山谷阻阨以一隅而當九達亦江左名區也州西北爲橫山峯巒秀拔四望皆橫故名治之鎮山也距城五里迤而西爲祠山明太祖駐師登此題爲天下英靈第一山亦距城五里又西巘山亦距

城五里更西爲陽山以峯面皆向陽也距城五十里北爲陽山豁更北爲岩頭山兩山屹然如闕中夾一溪州之水悉滙此入建平界每遇巨潦藉此以障湍流奔突之勢距城四十里若白茅嶺則入建平界矣沿西而南若分界山大岩山大磊山皆接建平境治西南爲智山距城三十里馬鞍山距城五十里金雞山石岩山距城六十里靈山羣峯迴遶如揖如輔絕頂有解愠臺石壁石梁有溪有潭有泉所爲靈山泉石甲于一郡者也距城七十里又平頂山距城七十五里桐山距城八十里

二山乃桐水發源處治東南曰石壁山距城三十五里
義蒼山雲山環抱碧澗號義蒼洞天距城四十里又石
媳婦山距城五十里更東南爲桃花山爲青山距城六
十里有若嶺關距城六十里路通安吉治東曰雞籠山
又乾溪山山勢高大一溪下遶無雨則竭白石燦然故
名並距城三十里蘇姑山距城四十里界連長興迤而
東北有長樂洞中有龍潭仙橋石田石磬深邈莫知所
窮距城六十里又五花岩山橫列五峯高約三百丈峯
頂有白佛寺石壁上刻唐天寶年月距城七十里迤而

北爲青燕嶺則接長興界爲銅關嶺則溧水界治之北
爲瑣山距城二十里五老山距城六十里志稱五老迴
旋于北三峯拱峙于南蓋指此山與笄山也過此爲金
牛山則入建平界矣州東六十里有苦嶺向通浙江安
吉州州東五十里有四安鎮陸走湖州此爲通道宋建
炎中兀术自廣德經此陷獨松關遂入臨安德祐初伯
顏入建康遣將出廣德會臨安亦此路合州之水皆發
源于州西南之山由澗而滙爲溪在州東者一曰福星
溪循流而出岩頭山者也在州西者三曰玉溪遶治西

而北環旋如帶日百店溪曰陽灘溪循流而出陽山之
間入建平界若城中之水一爲桐川自州東來一爲池
河自州南東南兩分而來俱入城出北水關入城河昔
人于巽丁坤三方導水入城以迎秀氣今漸湮塞矣按
通志謂州山高而谿峻水無停蓄田犂确無魚鹽之利
林澤之饒賦不登於上錯產不逮於中人守土者興陂
塘以時蓄洩蓋要務也語極切故節錄之常額當差人
丁併優免餘丁共四萬三千四百一十九丁據嘉慶二
十四年冊報滋生人口閤州土著男婦大小人丁三十

萬五千四百六十六丁口實在田地六千二百九十八
頃三十八畝零丁田共徵正耗銀三萬六千九百八十
七兩零外不在丁田徵解共徵正耗銀七兩零實徵本
色米八千四百五十二石六斗零又徵黃豆九百三十
二石一斗零內兌漕共正耗米六千四百三十九石一
斗零常平倉實存穀三萬二千一百七十八石四斗零
社倉無學田三頃四十八畝零應徵銀三十九兩零歲
入學額二十五名防禦則廣德營之都司駐焉州設民
壯三十四名驛站夫馬工料共支銀六十五兩設官知

州一員繁難中缺州判一員學正一員訓導一員吏目
一員杭村司巡檢一員

皖省志畧

卷四

五

建平縣

縣爲漢故鄣縣地三國吳廣德縣地梁陳石封縣地隋綏安縣地唐廣德縣地宋端拱元年析置建平縣屬廣德軍元屬廣德路明屬廣德州

本朝因之縣治在州西北九十里距省五百七十里東西距八十五里南北距一百四十里東四十五里至白茅嶺本州界西四十里至南碌湖湖中寧國府宣城縣界南九十五里至鴉山保唐規嶺寧國宣城二縣界北四十五里至定埠鎮江寧府高淳縣界縣舊無城明崇正八年知縣侯佐始築周不及二里門四水門一東南環溪爲濠西北至東各有池

本朝康熙四年城圯復修三十七年重修稽形勝則浮湖渟泓于左赤山聳拔于右西北有三溪之匯東南有白茅之竒城中有鳳凰山在西北隅治南曰鎮山端平若几爲邑治之近案距城五里再南爲霄峰山距城五里更南曰大岩山小岩山距城七十里曰石佛山距城八十里與石佛相連者爲青苔嶺又鴉山距城九十里上有一石高二丈許有彈蹟百餘俗呼爲彈子石又

有仙人釣台宋梅詢詩茶煮鴉山雪滿甌以山產茶曾入貢南接寧國界治東南曰滌山距城三十里又大磊山羣山拱峙一峯特起巔有三石如磊字距城八十里分界山距城四十里則與州分界處治西南曰赤山距城七里更西南爲峽子嶺距城八十里與宣城分界處相近有青苔嶺懸巖千仞其下有清潭治之東曰烏雲山土人以雲氣占雨距城二十五里大谿山桐水出焉距城三十里泉水山亦距城三十里龜山距城三十五里更東爲白茅嶺山產白茅故名距城四十里與州境

連界處也治東北曰金牛山距城十五里大濤山距城二十五里亭子山距城三十五里伍牙山相傳伍員伐楚還吳曾建牙於此距城四十里縣西十里有諸葛城中可容數千人旁有驢城馬城相去一二里其間有井數十蓋昔人避兵屯駐之所又有浮城在縣西十里廣數畝其地汙下每遇夏潦諸圩盡沒惟此巋然若浮因名縣南有文昌河源出白茅嶺經縣治之前達宣城之南湖北有清澗源出亭子山合諸小水入南湖下通溧陽三塔寺堰者爲梅渚河爲胥溪繞赤山之麓者爲赤

山溪歷鎮山之下者爲淘淋港環繞縣治者爲西河二水合流者爲合溪又南漪湖在縣南四十里廣德及縣之水俱滙焉北入丹陽湖俗呼南湖九域志作南綺湖常額當差人丁併優免餘丁共二萬五千六百二十八丁據嘉慶二十四年冊報滋生人口閤縣土著男婦大小人丁三十一萬五千九百一十六丁口實在田四千一十五頃六十七畝零丁田共徵正耗銀二萬八千八百七十三兩零外不在丁田徵解共徵正耗銀十三兩零實徵本色米五千三百一十二石一斗零又徵黃豆

六百二十石八斗零內兌漕共正耗米四千三十石零常平倉存穀二萬九百五十八石六斗零又存米五十二石五斗零社倉實存穀九千五百六十七石三斗零學田四十二畝零應徵銀六兩零歲入學額二十名防禦則廣德營之把總駐焉縣設民壯二十四名設官知縣一員繁難中缺教諭訓導各一員梅渚司巡檢一員
典史一員

滁州

州於天文爲斗分野星紀之次在禹貢爲揚州之域戰國屬楚秦爲九江郡地漢爲九江郡建陽縣後漢爲全椒縣地晉屬淮南郡東晉初僑置頓邱縣及郡後郡廢以縣屬秦郡宋元徽元年改置新昌郡治頓邱縣齊梁因之東魏移譙州來治亦曰南譙州隋開皇初郡廢改南譙州曰滁州頓邱縣曰新昌十八年改曰清流大業初州廢以縣屬江都郡唐武德三年復置滁州天寶元年改永陽郡乾元元年復曰滁州屬淮南五代因之宋

皖省志畧

卷四

九

曰滁州永陽郡屬淮南東路元至元十五年陞爲滁州路二十年仍降爲州隸揚州路明初以州治清流縣省入屬鳳陽府尋直隸南京

本朝屬安徽省領縣二曰全椒來安州治在省東北六百五十里東西距一百四十里南北距三百一十里東至江寧府六合縣界七十里西至鳳陽府定遠縣界七十里南至和州界一百八十里北至泗州盱眙縣界一百三十里本州境東西距一百四十里南北距一百八十里東至江寧府六合縣界七十里西至鳳陽府定遠

縣界七十里南至全椒縣界五十里北至泗州盱眙縣界一百三十里自州治至京二千二百五里州舊有子城關城羅城之別子城卽今州治關城卽今上下水關羅城卽今城羅城之外有月城水關磚甃上有敬德字相傳唐尉遲恭督造云明洪武中拓爲今城周九里十八步門六跨沙河爲池又有上下水關建於宋嘉定時明洪武中修

本朝康熙九年修乾隆六年重修其形勝則南以長江爲天塹與和州相聲援西北一帶諸山繞之谿峰盤紆

歐陽永叔所謂環滁皆山也爲江淮之要衝東南之外捍治南之山最近者曰豐山盤踞雄偉出瑯琊諸峰上有雲如帽則雨澤至歲旱禱之立應諺曰峰山著帽豐年之兆宋梅賾記云山在滁治之西南盤亘雄偉出瑯琊諸峯上天欲雨則雲氣覆山巔歲倚以豐故名可証山麓有醒心亭宋歐陽修建曾鞏爲之記又醉翁亭歐陽修自爲記有溪夾流而下曰釀泉俱距城五里更南爲花山北屬州境南屬全椒距城二十八里稍西爲瑯琊山晉元帝爲瑯琊王避地於此故溪山皆由之得名

其地幽勝名賢多有題咏距城十里又石屏山距城五里稍西南爲火蓬山又西曰磨拖嶺曰福山皆接全椒界並距城二十里又馬鞍山距城二十三里尖山距城三十里常山距城三十五里仙居山山徑秀折與小山隔溪相對與定遠界距城六十里皇甫山爲皇甫將軍屯兵之所與定遠界距城七十里治北有永陽嶺距城三里更北爲秦王拖鍬嶺距城七里又白米山西北通盱眙東北通來安距城三十里迤西爲石駝山距城二十二里旁有清流關南唐所置地最險要宋太祖破皇

甫暉於此距城二十五里珠龍山關山峯巒層疊與清流關相聯絡距城三十五里牛頭山以形似距城四十五里有長嶺嶺爲通道亦距城四十五里又踏肋山盈福山並距城五十里更西北爲黃牛山石屋山距城六十里通定遠界治東北十七里有黃道山與來安連界按李瀆苻溪記云昔秦始皇道經是山故名下有秦皇塘治之東爲滁河源出廬州舊梁縣入全椒與襄水合至三汊河與清流河合達瓜埠入於江清流河者源出清流山東南流至三汊河口合於滁河又白茅河在州

西北四十里亦出清流山州西北有瓦店河盈福河及來安縣之嘉山河俱流合焉東會於清沙河在州北四里一名江沙澗出來安縣界州西北諸山溪之水多流會焉俗名大沙河至州城東合於清沙河又有小沙河源出州西南三十五里側菱山溢爲小澗經州西十里注於石瀨石瀨者有石生水底嵯峨突兀連亘數十丈水流其中澎湃有聲故名又東爲西澗俗名爲烏土河宋太祖入滁以兵浮西澗入北門蓋西澗者舊時瀦水以爲備禦其下流爲小沙河穿城東出合於清流

河又菱溪在州東七里源出永陽嶺經皇道山又東南瑯琊溪亦流合焉同注於滁河又皇華驛在故關城內宋淳熙時建明於驛東建太僕寺及滁陽八監驢驢等十八羣常額當差人丁并優免餘丁共一萬一千八百九十一丁據嘉慶二十四年冊報滋生人口闔州土著男婦大小民屯人丁二十萬二百二十丁口實在田地三千七百六十二頃四十七畝零丁田共徵正耗銀二萬三千四百七十九兩零外不在丁田徵解共徵正耗銀七百三十四兩零實徵本色米二百三十二石四斗

零又徵本色黃黑豆共三百三十石四斗零常平倉實
存倉穀一萬七千五十一石三斗零社倉實存穀一萬
二千四百五十石五斗零學田七頃五十七畝零應徵
銀五十四兩零歲入學額二十名防禦則浦口柳營之
把總駐焉州設民壯四十六名滁陽大柳二驛夫馬工
料銀五千八百二十四兩設官知州一員衝繁中缺學
正訓導各一員吏目一員

全椒縣

漢置全椒縣屬九江郡後漢因之晉屬淮南郡東晉廢縣僑置南譙州宋齊因之梁改郡縣俱曰北譙大同二年兼置譙州後魏移州治新昌廢北譙郡入臨滁陳大建七年復曰北譙郡隋開皇初郡廢改縣曰滁水大業初又改曰全椒屬江都郡唐屬滁州五代宋元因之明初省入州洪武十四年復置仍屬滁州

本朝因之縣治在州南五十里距省六百四十里東西距一百一十里南北距五十五里東二十里至界首江

寧府江浦縣界西九十里至沙河廬州府合肥縣界南三十里至後河中流和州界北二十五里至清塘本州界縣城自明成化七年知縣張碧創始嘉靖戊午知縣顧達始築爲城周二里有奇東北跨覆釜山門三並有重樓襄河遶其後爲池萬厯崇禎時相繼修葺

本朝康熙七年重修其形勝則邑之山形勢深邃而山水傾瀉瀉歸襄河河環如帶東流入江土厚水秀蔚乎人文颯颯乎王國之風也釜山在城中之西隅城跨其上城外之山多聚於西北在南者曰南岡山連亘數里

邑治學宮皆面焉上有岡峯拔起名爲筆峯毓秀相連而西爲烏龍岡距城二里再南爲武家岡距城十五里九鬪山一名陰陵山項羽經此與漢兵一日九鬪故名史稱北譙太守陳昕除陰陵戍主卽其地也距城二十五里治西南有府城岡爲廬州孔道距城十里砂石山距城十四里稍南爲豐干嶺距城三十里千人會山與豐干嶺相望南接和州界治北有走馬岡縣治之北護也距城一里雲甸岡縣北之再護距城十里稍東爲武山一名武子山其巔有武帝廟距城二十里泉峯山縣

北之三護也距城十五里由泉峯而北曰椒林山迤西曰劔舞山皆距城二十五里桑根山距城三十里梁大同三年割北徐州之新昌郡譙州之北譙郡立南譙州於桑根山之西是也洞山距城三十五里陡山山最幽邃馬鞍山以形似名垂石山有大石下垂故名又赤扈山並距城四十里龍檜山有檜樹如龍遇旱禱之立應石樓岳有雙石聳峭如樓並距城五十里與桑根山冷水澗相連雙石高竦猶如樓閣背山面溪景物幽邃銅井山山有井廣袤數十丈隨地理志梁載言十道志皆

云縣有銅官山其上有銅井唐以前曾采銅於此久廢有魚出泉中色如金孤山其形獨高並距城六十里菩薩山距城七十里臥龍山山勢蜿蜒如龍臥狀破山似一山鑿破爲二獨山舊有楊行密祠並距城八十里極西北爲石臼山乃襄水發源處路通定遠鎮山嶺接合肥界五尖山接定遠界俱距城九十里治之西有廟山距城十五里曰神山山洞幽邃韋應物有寄全椒山中道士詩道士所居卽此距城三十里曰袁子山袁術據淮南稱王於此又蘇山距城四十里經縣治之後曰襄

河屈曲而南稍東經學前達石潭與滁河合至三汊河又與清流河合後河通和州鄆湖源出三山尖過破山口自寨子澗入滁河小湖爲古蔡湖之支流湖心雖亢旱不竭蔡湖在縣南十五里居民多引流以溉田傍有蔡城志云南唐築城湖側蓄水以禦周師至再安河稍河興塘埧諸水皆歸三汊河東南入和州江浦界東北入滁州界蓋邑地負山帶水山起西北水向東南合襄滁二河之水而歸大江縣西南有六丈鎮唐設六丈驛於此又有葛城驛志云在縣東南二十里與江浦縣接

界輿程記云自滁州而東南六十里至東葛城驛又三十五里至江浦之江淮驛渡江向金陵是也常額當差人丁併優免人丁共一萬九千九百一十八丁據嘉慶二十四年冊報滋生人口閤縣土著男婦大小民屯人丁二十九萬二千九十四丁口實在熟田地一千二百四頃八十九畝零丁田共徵正耗銀二萬一千八百四十一兩零外不在丁田徵解共徵正耗銀八百五十八兩零實徵本色米百八十八石三斗零又徵黃黑豆二百六十石九斗零常平倉實存穀二萬五千九百五十

二石零社倉今無存學田一十三頃五畝零應徵銀六十八兩零歲入學額二十名防禦則浦口營之把總駐焉縣設民壯二十名設官知縣一員簡缺教諭訓導各一員典史一員

來安縣

縣爲漢建陽全椒二縣地東晉爲頓邱縣地梁置高塘郡屬譙州東魏因之後周時廢郡爲高塘縣隋開皇初縣廢爲清流縣地唐景龍三年析置永陽縣屬滁州五代南唐昇元二年改曰來安宋乾道中廢縣爲鎮尋復爲縣屬滁州元明不改

本朝因之縣治在州東北四十里距省七百五十里東西距八十里南北距一百二十里東三十里至施官集橋江寧府六合縣界西五十里至嘉山泗州盱眙縣界

南五十里至烏衣河北本州界北七十里至長店集泗州盱眙縣界縣城自明成化四年知縣趙禮築土垣嘉靖三十五年知縣魏大用始爲磚城周三里有奇門六各有樓崇正時知縣吳志高鑿池深三丈廣五丈

本朝康熙中修乾隆二十一年重修稽形勝則西捧豐山之趾南通浦口之津東連瓜埠之陰北撫盱眙之背志云江淮保障滁陽奧區信不誣也治東有山曰西龍山山峯峻拔與六合東龍山相望距城二十里黃連山山有石凸亦與六合連界距城三十五里東北有五湖

山下臨五湖因名一名禪山以山北有白禪村也在縣境爲險要由盱眙取道於此距城十八里又東北曰佛子山距城三十里曰王母山山有池廣三丈曰龍泉山之泉爲龍泉俱距城四十里又高唐山向陽山距城五十里更東北曰團山距城五十餘里曰荆塘山路通盱眙曰三山三峯攢矗連亘四五里南爲白塔鎮北接天長境治北有白塔山距城二里尖山其山特起下臨大澗距城二十里烏石山土色黑並距城三十五里石固山羣山盤互惟此山獨高三面險峻登陟者由南碕

一逕入宋紹興間邑民避寇保聚於此明宣德時嘗產騶虞於山邑令表獻稱瑞卧羊山以形名距城三十五里又浮山距城四十五里樊山距城六十里方山距城七十里至清和嶺與盱眙界距城八十里迤西爲馬嶺距城九十里治西北有伏牛山延亘甚遠距城二十里練寺山上有浮石高百餘丈下有清泉山之東北有地名浮林距城二十五里獨山距城三十里又巒樓山峯起如岑樓曰大廸山上有石坑並距城四十里曰龍窩山曰斗山並距城五十里曰金壇山接盱眙界距城八

十里治之西有香爐山嘉山亦接盱眙界西南有烏龍山距城十三里八石山卽淮南八公憩息之所又名八仙山距城十八里磨山去八石山里許距河而南有金家山距城三十里過此入滁州界東南有延塘山古建延唐寺距城五十五里接江浦六合縣界邑治之水有來安水大石塘水吳沛水雙源沛水秋沛水皆經五湖山之西會龍尾河水流小入滁河合流歸三汊河由六合出瓜埠口入於江其常店水白塔水長溝水范莊水彭家灣水以及馬嶺諸水皆由盱眙天長界入運

河又縣東北五十五里有白塔鎮其東南有丁城四面平遠城地高數丈其西近高塘山山下有塘曰高塘可灌田二百頃又來安鎮在縣東三十里舊設鎮於此今廢又東五里曰杜家集傍峙黃連山下有大石砬又東十里曰朱家砬與六合縣接界又水口集在縣東南三十五里臨湯河志云縣東北十里有來安驛往來孔道也常額當差人丁並優免餘丁共九千二百五十八丁據嘉慶二十四年冊報滋生人口闔縣土著男婦大小民屯人丁二十五萬一千六百一十五丁口實在田地

八百六十五頃七畝零丁田共徵正耗銀一萬四千九百二十四兩零外不在丁田徵解共徵正耗銀四十七兩零實徵本色米一百九十六石七斗零又徵黃黑豆三百石二斗零常平倉實存穀一萬八千五百七十七石五斗零社倉實存穀一萬一千八百五石一斗零學田無歲入學額十二名防禦則浦口營之外委駐焉縣設民壯一十九名設官知縣一員簡缺教諭訓導各一員典史一員

和州

州於天文爲斗分野星紀之次在禹貢爲揚州之域春秋戰國時皆楚地秦爲九江郡地漢置歷陽縣爲九江郡都尉治後漢爲揚州刺史治三國屬吳晉初屬淮南郡永興元年分置歷陽縣宋永初二年又於郡置南豫州齊建元二年州廢以郡屬豫州永明二年屬南豫州梁因之北齊兼置和州隋平陳郡廢大業初復改州爲歷陽郡唐武德三年杜伏威歸國改爲和州天寶初復曰歷陽郡乾元初仍曰和州屬淮南道五代屬南唐後

皖省志畧

卷四

二十一

入於州宋仍曰和州歷陽郡屬淮南西路元至元十五年升爲和州路二十八年復降隸廬州路明初吳元年以州治歷陽縣省入洪武三年廢州爲歷陽縣尋復爲和州直隸南京

本朝屬安徽省領縣一曰含山州治在省治東北四百六十里東北距一百八十里南北距二百里東至江寧府江浦縣界六十里西至廬州府巢縣界一百二十里南至廬州府無爲州界九十里北至滁州全椒縣界一百一十里本州境東西距九十里南北距一百五十里

東至江浦縣界六十里西至含山縣界三十里南至無
爲州界九十里北至含山縣界六十里自州至京二千
二百八十里州舊有城按城邑考謂州城一名亞父城
相傳范增所築漢高祖令灌嬰還定江淮又築之謂之
古羅城宋嘉定中嘗營繕明初知州張純誠重修周十
一里有奇門六上皆有樓水關二濠塹深廣萬厯元年
知州康誥於六門築月城皆十五丈內外皆磚上爲女
墻崇禎時陷於流寇知州萬民戴重葺

本朝康熙九年雨圯復修乾隆二十一年二十九年屢

修東南瞰大江西控淮淝北接滁濠爲姑孰金陵之蔽
淮南之要衝也山之踞州南者曰西梁山亦曰天門俯
瞰大江與太平府博望山相對博望一名東梁山上
有梁王城下爲梁王鎮距城六十里六朝時於此屯兵捍
禦治西山有豐山崇岡綿阜蜿蜒數十里距城二十里
又棗林山俱與含山分界西北闌龍山臨歷湖之北疑
卽古歷陽山也距城二十里山北爲九隴山九峯蜿蜒
中抱大壑距城二十五里西出爲鳳凰山距城三十里
更西爲孤山距城二十五里接含山界九隴之北爲鶴

籠山陰崖峻絕斷磴絙鍊引以登巔頽視羣山無敢並者道書稱爲第四十二福地距城四十里治之北有大道直通全椒中有青山夾山距城五十里大道之西有白雲山又斗視山亦曰斗陽山秦斲道通轍舊有關今存故址俱距城三十里又四方山舊名六合山山形磅礴四面皆正上有石潭深不可測名釜牛井志云梁武帝嘗登此以望六合因名距城六十里大道之東聖女山又赭樂山距城五十里又孔夫山距城六十五里又陰陵山卽楚項羽迷道處距城八十里旁出爲北山爲

紅石山接江浦界界於東北者曰東華山曰八公山俱距城半里許山特培塿以近郭名人每遊吟於此故並著云水之環州南而東下者曰裕溪河在州南六十里源出巢湖自無爲州流入境南注於江此與無爲分界者又有太陽河姥下河牛屯河皆在州之南歷東南以達於江牛屯在州南四十里與州東牛渚磯相對江面約五十里河源出東湖從銅城河入大江其曰烏江者卽亭長艤舟待項羽處古烏江縣址猶存曰沙河曰石碛河曰至馬河由州之東北以達於江州西之水經州

者曰歷湖又名麻湖在州西三十里周回七十里舊稱巨浸淮南子所稱歷陽之都一夕變而爲湖者明永樂時水涸議堰爲田凡得三萬一千二百餘畝景泰二年田始成熟特地勢平行水難泄時有泛溢之患亘州之北曰後河源出廬州達瓜埠以入於江按州爲古歷陽郡淮南之要衝江表之藩蔽橫江在州東南三十五里直江南采石渡處自昔濱江之津要也又柵江在州西南一百五十里與無爲州中流分界卽濡須水入江北口也江防考稱大江行州界凡一百一十里與太平府

中流分界江流自西南遶而東北故首稱和州爲江西而大江夾岸津要甚多隨地立名分途汛守實皆大江也又有夾山關在州北五十五里有夾山舖兩山壁立竦峙夾道與滁州接界爲南北咽喉云又石湖關在州西北宋紹興中烏珠犯境張浚以兵五千守石湖關烏珠遁去卽此斗齒關在州西北四十里其地有斗齒山亦曰陡陽山巍然峻絕一逕中開又白塔關在州西四十里又西五里曰含山關常額當差人丁并優免餘人共八萬四百五十九丁據嘉慶二十四年冊報滋生人

丁閤州土著男婦大小民屯人丁三十六萬六千九百
十六丁口實在成熟田三千二百四十三頃一畝零丁
田共徵正耗銀三萬六千六百四十四兩零外不在丁
田徵解共徵正耗銀三千九百三十兩零實徵本色米
三千八百三十五石三斗零常平倉實存穀共二萬九
千二百四十二石九斗零社倉實存米四千三百三十
六石三斗零學田額租稻麥折銀八錢零歲入學額二
十名防禦則遊兵營之守備駐焉州設民壯三十六名
驛站夫馬工料銀二百八十兩零設官知州一員繁疲

皖省志畧

卷四

二十六

中缺州同一員學正一員訓導一員吏目一員牛屯司
巡檢一員裕溪河巡檢一員

含山縣

縣爲漢歷陽縣地東晉僑置龍亢縣屬歷陽郡宋齊以後因之後周天和初省入歷陽唐武德六年析歷陽之故龍亢縣地置含山縣屬和州八年縣廢長安四年復置更名武壽神龍元年復曰含山仍屬和州五代宋因之明洪武三年改屬廬州府尋還屬和州

本朝因之縣治在州西六十里距省五百七十里東西距七十里南北距一百四十里東三十里至司基橋和州界西四十里至界首舖廬州府巢縣界南八十里至

新濶圩廬州府無爲州界北六十里至後河本州界縣舊無城明正德七年知縣張文淵始築土垣周三里有奇四門池深廣各丈餘嘉靖中知縣葛麟易以磚石本朝順治康熙中屢修乾隆二十一年重修邑境橫亘百里爲內險之地南之東關自巢湖通江之要衝也北之昭關自淮而來之要衝也西之普王城斗陽關自廬毫而來之要衝也蓋和爲江之蔽含又爲和之蔽云治之西有橫山卽含山山勢雄峙若吞含諸山然距城三十里縣名取此迤西北曰黃鶯山距城十六里牛頭山

距城三十里黃山卽仙踪山周迴約二百里有三百六十峯西接巢縣北接合肥在巢境則稱爲龍泉山距城六十里又斗陽山距城四十里亦半屬巢縣治北爲小峴山距城十二里更北爲城山兩山兀峙爲廬濠往來要衝有昭關卽伍員夜度處又宿山俱距城二十里褒禪山亦名華山王安石有遊褒禪山記距城二十五里石臺山距城三十里治東北曰天公山亦名天鼓山形家指爲縣治之龍脈距城十里大峴山亦名赤燄山距城十三里華陽山亦名蘭陵山山有前後二洞前洞可

遊後洞窈深難入距城十八里又東林子山距城二十里過此則州境治西爲特畱山距城十八里稍南爲尖山爲桃花山距城二十里龍洞山距城三十里更西南爲亞父山則屬巢縣濡須山則屬無爲矣濡須山在縣西南七十五里與巢縣七寶山對峙濡須水出焉其間卽東關口也治之南爲花山距城五里又南爲八分山一名雲霧山又石門山兩山並峙石壁峭立如門俱距城二十里蒼山巍然屹立根蟠十餘里距城十里又太湖山山下舊有湖已湮而名僅存距城七十里更南爲

白石山周迴七十里道書稱爲二十一洞天名曰瓊秀
長庚之天距城八十里治東南曰梅山爲縣儒學之案
卽魏武指梅林以止渴處唐改爲棲隱山距城五里更
東南曰大山距城十里曰龍角山距城十五里過此接
州界水之大者北有仙踪河達於後河入州境西南有
梅子口河濡須水委流也又西有清溪河並由裕溪以
達於江運漕河者在縣南八十里河南爲無爲州界水
通巢湖納廬合諸縣之水以通於江今猶爲漕艘運道
三汊河者西通巢縣東通大江北通銅城閘故名也銅

城閘者東支爲牛屯南支爲三汊河江湖水汛實爲衝
隘故築堰設閘以捍水患又觀音河經縣東南達州界
又東關在縣西南七十里濡須塢之北與無爲州巢縣
接界其地險峻周圍皆石三國時爲戍守重地又斗米
逕在縣西八十里隋末杜伏威將李子建欲於東關下
開溝通黃港運糧入湖以濟軍食率部下人齎斗米就
役米盡逕成因名常額當差人丁併優免餘丁共二萬
二千四百六十丁據嘉慶二十四年冊報滋生人口閤
縣土著男婦大小民屯人丁二十四萬三千八十九丁

口實在田一千五百九十六頃九十九畝零丁田共徵
正耗銀一萬八千九百五十七兩零外不在丁田徵解
共徵正耗銀一百七兩實徵本色米一千三百九十八
石四斗零常平倉實存穀一萬二千一百九十四石三
斗零社倉實存穀一萬八千六百二十三石二斗零學
田二十七畝應徵銀一十一兩零歲入學額二十名防
禦則遊兵營之把總駐焉縣設民壯一十九名驛站夫
馬工料銀二百六兩設官知縣一員疲難中缺教諭訓
導各一員運漕鎮巡檢一員典史一員

六安州

州於天文爲斗分野星紀之次在禹貢爲揚州之域夏禹封皋陶之後于六春秋時六國戰國楚地秦置六縣漢初爲淮南國治文帝十六年分置衡山國武帝元狩元年國除爲衡山郡二年改置六安國後漢建武十三年以六安國屬廬江郡三國屬魏爲廬江郡治晉復曰六縣爲郡治宋省入潛縣隋爲霍山開化二縣地唐開元二十七年改霍山置盛唐縣屬壽州五代梁改曰潛山後唐同光初復故晉天福中又改曰來化尋復曰盛

唐宋開寶四年改曰六安政和八年於縣置六安軍屬淮南西路紹興十三年廢爲縣嘉定五年復爲軍端平元年又爲縣後復爲軍元至元二十八年仍降爲縣屬廬州路後復升爲州明洪武初以州治六安縣省入屬鳳陽府十五年還屬廬州府

本朝雍正二年升直隸州領縣二曰英山霍山州治在省治西北四百四十里東西距二百一十里南北距二百二十里東至廬州府合肥縣界五十里西至河南光州固始縣界百六十里南至安慶府潛山縣界一百八

十里北至鳳陽府壽州界四十里州境東西距一百二十里南北距一百里東至合肥縣界五十里西至霍邱縣界七十里南至霍山縣界六十里北至壽州界則四十里自州治至京二千九百五十里州舊有土城明初指揮王志愨以石正德中毀于寇知州李充指揮劉芳撤而新之增置敵臺二十七座周五里二百二十步門五有樓有月城池深一丈四尺濶七丈崇正末爲張獻忠所陷補修未竟

本朝順治雍正間重修乾隆十三年復修州之地勢龍

穴鎮其東番山衽其南西境千岩綿亘數百里扼楚豫之要淠水潏洄肥淮交匯實金陵之屏障廬郡之肘臂也番山爲州治鎮山距城二十里由此而南爲小霍山遠連霍脉傍有豹子崖相接者曰大同山其勢峻削僅通樵徑三山並距城五十餘里又有八仙巖石壁相向其洞有八距州城六十里雷峯巖距州城七十里相傳有臯陶墓又習鑿齒墓亦在此又南有指封山漢武帝南巡歸登復覽山見此山峯峻拔乃指封爲霍嶽副距州城九十里距下埠河橋而西有嵩寮崖一名松林有

石窿起距州城八十里齊雲山距州城九十里約高一千八百丈層峯疊翠頂平而嶺上有水晶庵龍潭雷公洞魁星崖諸勝跡距蘇河而西爲九公山高九百丈頂有九石如人形上有浮屠梵院獨山則地平曠一峯獨峙二山並距城七十里治之西武陟山距州城三十里漢武南巡登封霍嶽于此駐蹕有宋焦炳焦煥書院遺址猶存又有寶教寺在其巔而固縣寺亦在其山之西其西南則有弩台爲漢武試弩處稍南爲漢王墩響山寺有段秀實故宅焉又西南寨基山極峻內有巉石相

拒如門抱兒山如母抱兒狀並距州城百有餘里再南有帽頂山劉五郎山汪家山岩巒秀茂聯絡諸峯迤東有軒皇嶺相傳軒皇停車處過此爲草鞋嶺清風嶺與霍山界韓婆嶺與商城界以上各山並距州城二百餘里黃巢山距二百里祖家山文家山遠近映帶林木茂密其聳削者則爲天柱山距城百七十里而枕于其麓者則羊山寨也治北十里有白沙城世傳漢追項羽于此東則爲龍穴山上有龍穴其水張又新品爲天下第一泉歐陽修集古錄所謂張路斯鄭祥遠二龍爭戰處

卽此上有塔有廣福寺州人遇旱禱雨輒應水在東境者曰馬柵河由桃城達巢湖南入于江在西境者百泉合流滙於淝河淝河有二源一出潛山一出蘇口皆迅激于萬山中傾瀉而出至九公之麓始合流北經州城通白沙以達于淮在西北境者曰溶河通固始縣更河北入正陽蓋本境之水雖出一源而支分派衍泛漲時湍激泓漫汪洋無際片帆上下目極烟波亦奇景又九公砦在州西南六十里九公山上有九石如人立因名又磨旗砦在州西百里又西百里有大堂砦西峯砦在

州西南七十里又州北七十里有趙家砦皆南宋時邑人保聚處按州治北界壽霍西連楚豫南通潛太綿亘四百餘里重山峻嶺西百八十里爲金家寨乃豫省光固極近之疆霍山西境黃氏河西冲等處界楚省之青台甕門二關英山之落梨河黃龍山父子嶺等處接楚之蘄州蘄水羅田山徑錯雜俱爲要隘又舊志云州山川環結號爲險隘自州之西南以迄於東北皆崇山峻嶺蔽虧日月肘腋光蔡襟帶蘄黃昔人謂申光蔡爲天下樞而六安又申光蔡之樞也常額當差人丁併優免

餘丁共三萬二千八百三十丁據嘉慶二十四年冊報
滋生人口閭州土著男婦大小民屯人丁九十二萬三
千六百八十三丁口實在熟田一萬一千八百七十七
頃八十二畝零丁田共徵正耗銀四萬二百二十八兩
零外不在丁田徽解共徵正耗銀六百八十二兩零實
徵本色麥六百七十八石六斗零又徵本色米七千一
百六十七石九斗零內兌漕共正耗米三千四百一十
石零常平倉實存穀一萬六千三百四十二石六斗零
社倉實存穀一萬八千五百六十四石八斗零學田五

頃五十七畝零應徵銀一十六兩零歲入學額共二十
名防禦則六安營之參將駐焉州設民壯三十四名驛
站夫馬工料銀六十九兩零設官知州一員繁疲難要
缺州同一員學正一員訓導一員吏目一員和尚灘巡
檢一員馬頭汛巡檢一員

英山縣

縣爲春秋時英氏地漢江夏郡蘄春縣地晉改蘄陽縣
劉宋爲蘄水縣梁設蘄陽郡縣屬焉唐因之宋爲蘄州
羅田縣地咸淳初分置英山縣屬六安軍尋廢德祐二
年復置元屬六安州明洪武初改屬鳳陽府十四年還
屬六安州

本朝因之縣治在州西南三百六十里距省六百三十
里東西距五十里南北距一百六十里東三十五里至
隘口嶺安慶府太湖縣界西十五里至落梨河湖北羅

田縣界南四十里至雞兒河湖北蘄水縣界北一百二
十里至分水中界嶺霍山縣界縣城自元至正間土築
周三里後圯明時但倚山帶河爲險城不復設宏治已
未盜起主簿徐璋重築缺東南隅因河爲濠門五明末
賊蹂躪之

本朝乾隆十四年重修其形勝則東拒溢口西阻界河
南扼石險北跨兩洪最爲要地治之鎮山在北曰鷄鳴
山周二十里高一百五十丈距城二里山之東曰古勝
山周十里高百丈距城八里烏雲山周二十里高一

五十丈距城十里又北曰蓮花峯距城二十里天人山險峻有寨距城三十里羊角山絕頂有石嵯峨如羊角唐高祖時老子降羊角卽此周三十里高五百丈距城四十里治南北二山相接曰神峯山上有寺距城三十里萬峯山距城四十里皆高五百丈麻姑山相傳麻姑仙至此周三十里高六百丈距城六十里龍井山距城七十里多雲山山有九井歲早禱雨輒應距城一百里與羅田界說者謂縣境之山最險者多雲多雲之西有天險曰岐嶺通湖廣蘄水縣馬道三日可東出豫境

西北一竇曰瓮門入其內廣三百餘里路通羅田迤北則爲虎頭木陵大城諸關通黃岡及河南固始諸縣蓋扼險出奇之處至東北石人山一峯踰丈儼如人立故名樓子山上有寨並距城七十里筆架山距城八十里天路山周二十里高三百丈紫台山周十五里高一百二十丈馬鞍山三山皆距城百里與霍山界南有文峯爲縣治對山近古勝城周七里高百丈距城五里文子山其山秀麗周二十里高二百丈距城十三里石馬山有石如馬周十里高百丈距城十七里崇山山極高峻

距城二十里治東打虎場周十里高一百二十丈距城四十里英山尖峯巒峭拔爲羣山冠上有水泉縣以此名周二十五里高三百丈距城五十里林關周四十里高五百丈距城七十五里排山以山勢橫排而名距城一百里治西豪粟山周二十里高八十丈雪山周十里高百丈二山皆距城十里張家寨山周三十里高二百丈蘆花山周二十里高二百丈文場山周十六里高一百七十丈密峯尖周三十里高三百丈山峯錯列以形似名並距城四十里水口山據河而立周十里高百丈

仙人臺則隔岸對峙周五十里高千丈二山皆距城五十里石門山隔縣山距縣六十里許與羅田界邑東北與西境各有湯泉土田賴以灌溉北澗河則環遶邑治源出諸山蓋英爲廬郡西南之盡境崇岡深壑鳥道崎嶇舟楫不通無大川之足錄云又按志縣南六十里有嶮石爲三縣水口巨石橫截於河以故邑中不通舟楫常額當差人丁併優免餘丁共二千一百八十七丁據嘉慶二十四年冊報滋生人口閭縣土著男婦大小民屯人丁一十六萬六千五百九十七丁口實在熟田六

百八十九頃八十三畝零丁田共徵正耗銀八千二百七十兩零外不在丁田徵解無項實徵本色米一千五百八石四斗零內兌漕共正耗米一千一百七十石又八斗零常平倉實存穀二萬二千一百四十五石八斗零社倉實存穀七千八百八十七石四斗正學田六十一畝零應徵銀二十兩歲入學額十三名防禦則六安營之把總駐焉縣設民壯二十七名設官知縣一員簡缺教諭訓導各一員七引店巡檢一員典史一員

霍山縣

縣爲春秋潛國漢置潛縣屬廬江郡後漢及晉因之宋爲廬江郡治南齊建元二年仍爲屬縣梁天監六年於縣置霍州又分置岳安郡岳安縣後魏因之北齊州廢隋開皇初郡廢改岳安縣曰霍山屬廬江郡唐武德初復於縣置霍州貞觀初州廢以縣屬壽州神功初改爲武昌神龍初改曰霍山開元二十七年廢入盛唐縣天寶元年復置霍山縣屬壽州五代因之宋開寶四年省爲鎮入六安明宏治七年復置縣屬六安州

本朝因之縣治在州西南九十里距省五百里東西距一百八十里南北距一百七十五里東三十五里至山王河本州界西一百四十五里至界嶺英山縣界南一百五十里至界嶺安慶府潛山縣界北二十五里至小七畝本州界縣城自元曹平章保障其地曾築土垣明宏治中知縣崔中吳霖因舊址增築歷正德萬歷迭甃磚石周五里四百步門四水關二池深一丈濶二丈明季寇燬重修

本朝雍正間修乾隆十四年復修邑治南嶽獨尊羣峰

拱衛龍溪合諸水以瀦遶亦山水之勝也治南霍山虞舜南巡至此漢武禮名山大川以衡山遠阻移祭於此以代衡岳表天柱山曰南岳上有祠左有卓筆峯距城五里志云山頂有大池北有龍湫南有風洞旁有試心亭其峯高一千一百三十丈東石門山與西石門山相對距城八里又東曰指封山距城三十里相傳漢武帝南巡見其峯巒峻拔封爲霍岳副稍北曰復覽距城二十里漢武帝南巡還復登此顧瞻天柱因名皆與六安州界相接又有通光山與分水嶺相對距城十里又北

曰站石山黃石嶺聖人山皆距縣二十里許香爐山香花嶺皆距縣十里山之在西境者曰潛臺上有寺一山突兀砥柱河中如臺距城三里又二里許有日魂月魄兩山對峙雙山亦對峙河中距城五里六安山上有寨曹平章屯軍之所四門基址猶存距城三十里馬鞍山仙人山皆距城四十里西北有烏梅尖兩峯多產梅北峯下有雷公洞作霧卽雨有雷公斧蹟產茗絕佳距城三十里黃石山距城四十里嵩山距城五十里挂龍尖有飛泉瀑布望之如龍桃源山亦有瀑布數百丈濶如

河並距城五十里九仙山距城七十里又治南文筆峯
距城三十里白石山距城五十里四望山高千八百丈
眺望極遠距城六十里甄家山距城七十里相接者爲
仙女臺上有大石如臺人莫能登鐵爐山相傳仙人于
此煉丹爐址猶存距城九十里五峯山距城一百五十
里此邑治南隅之盡境東南平頂山距城五十里虎立
山距城三十里天柱山皮山並距城五十里迤東金子
山山色如金距城八十里西南爲碁盤嶺上有碁盤石
距城二百十里四十八盤山行旅陟降用杖撐擔而立

凡四十八柱始盡故名距城一百二十里鷗翎山臨河
壁立撞下山程伊川長子端中墓在焉並距城一百五
十里路通英山治北淠水卽龍溪過壽春會潁入淮爲
吳楚通津古有潛蛟楚公子芊乙射之蛟逃焉沙河源
自方山中來八六安州界入淮治南有雙河源出諸山
會中埠河漫水河由淠河沙河入淮又梅子關在縣東
梅子嶺上又縣西南五十里有金雞關南北二關對峙
路出英山皆昔時戍守處又金子砦在縣東八十里李
郎砦在縣南六十里皆昔人避兵處常額當差人丁併

優免餘丁共七千六百三十六丁據嘉慶二十四年冊報滋生人口閭縣土著男婦大小民屯人丁四十一萬五千八百九十七丁口實在田三千一百二十六頃七十九畝零丁田共徵正耗銀一萬四千五百七十兩零外不在丁田徵解共徵正耗銀四十七兩零實徵本色麥八十四石六斗零徵本色米一千七百七十二石零內兌漕共正耗米六百八十石零常平倉實存穀一萬三百四十一石二斗零社倉實存穀八千六百九十七石七斗零學田四十畝應徵銀四兩零歲入學額十二

名防禦則六安營之把總駐焉縣設民壯二十三名設官知縣一員繁難中缺教諭訓導各一員上土市巡檢一員典史一員

泗州

州于天文爲奎婁分野降婁之次明史天文志云泗州之盱眙天長二縣皆斗分星紀之次在禹貢爲徐州之域周爲徐國秦屬泗水郡漢置夏邱縣屬沛郡又置徐縣元狩六年兼置臨淮郡後漢永平中改屬下邳郡臨淮郡廢晉太康元年又分置臨淮郡治盱眙以徐縣屬焉永嘉後臨淮郡徐縣俱廢劉宋省夏邱縣梁置高平郡東魏武定六年復置夏邱縣屬臨潼郡兼置高平縣北齊置夏邱郡尋置潼州周改潼州爲宋州改夏邱縣

皖省志畧

卷四

四十四

曰晉陵隋開皇初夏邱郡高平郡俱廢十八年宋州廢復夏邱縣改高平縣曰徐城屬下邳郡唐武德四年置泗州時州治宿預徐城屬焉於夏邱縣置仁州析其地置虹縣六年省夏邱貞觀八年仁州廢以虹縣屬泗州長安四年割徐城置臨淮縣開元二十三年自宿預移州治于臨淮天寶初改臨淮郡乾元初復曰泗州屬河南道元和四年割虹縣屬宿州五代因之宋亦曰泗州臨淮郡建隆三年省徐城縣入之屬淮南東路紹興四年割虹縣屬泗州金仍曰泗州屬山東西路大定六年

屬南京路元屬淮安路明初省臨淮縣八州改屬鳳陽府

本朝雍正三年升直隸州屬安徽省乾隆四十二年裁鳳陽府所屬虹縣地入州爲州治領縣三曰盱眙天長五河州治在安徽省治東北七百六十里東西距二百九十里南北距二百里東至江蘇淮安府山陽縣界二百五十里西至鳳陽府靈璧縣界四十里南至滁州來安縣界一百四十里北至江蘇徐州府睢寧縣界六十里本州境東西距二百一十里南北距九十里東至清

河縣界一百七十里西至靈璧縣界四十里南至五河縣界三十里北至睢寧縣界六十里自州治至京二千里泗州故城自

本朝康熙十九年淪于淮水寄治盱眙山今城本係鳳陽府虹縣城舊惟土堡明景泰初知縣王磐宏治中知縣樊江修之萬歷二十二年知縣任愚甃磚周五里十三步門五水門二敵臺八座池深九尺濶三丈

本朝乾隆四十二年將虹縣裁併泗州卽改虹縣城爲州城其地北枕清口南帶濠梁東達維揚西通宿壽梁

宋吳楚之衝齊魯汴洛之道治北曰屏山列翠環抱周八里高三十五丈蟠龍山有石蟠伏如龍周五里高三十丈城以二山爲屏障並距城二十里蟠龍稍東爲峯山周三里距城二十五里土山周五里距城三十里此三山雖微亦北境之護也巒山在州西四十里下有巒山湖南通淮一作碧山志云以土色碧故名巒石山在州西百二十里淮水北岸與南岸浮山相對卽梁天監中築堰處也又西有車門有路通車九山在州西北八十里以有九岡而名北接懷遠之塗山治東北秦橋山

爲一州分水之處爲往來通道距城二十里再北爲朱山上有聖水泉甘而冽雖旱不涸梁忠臣朱買臣祠在焉周二十里高五十丈距城四十里赤山三面據水舟中望之勢殊天矯周三十五里距城七十里治西鹿鳴山周四里高十二丈距城三十里明成祖駐驛于上夜聞鹿鳴因名石龍山距城二十里自秦橋山以下山舊皆屬虹縣又城西五十里有垓下聚垓下是高岡絕峯今猶高三四尺漢兵圍項王數重處城北有汴河自汴梁東流入本境一名葭蕩渠一名浚儀渠東北自秦橋

山分水北流爲北潼河南流爲南潼河南潼北潼之外
又有淒河及南沱河北沱河羊城湖老營湖支分派別
皆交會合流以入于淮淮水在州南一里西自臨淮入
五河縣流經盱眙抵州城之南會諸水爲洪澤湖東北
入山陽界汴水舊在州北西北自虹縣流至州界入淮
宋蘇軾云自唐以前汴泗會於彭城之北然後東南入
淮近歲汴水直達於淮不復入泗矣蓋自隋開通濟渠
始也然觀韓退之詩汴泗交流郡城角是唐時汴泗猶
會流入淮惟近世黃流屢決汴水被淤遂失其經流矣

洪澤湖在州東北濶百二十里會諸湖水而通於淮卽
今州城之所陷也常額當差人丁並優免餘丁共三萬
九十丁據嘉慶二十四年冊報滋生人口閭州土著男
婦大小民屯人丁六十三萬四千七十五丁口實在熟
田地二千三百五十九頃四十四畝零丁田共徵正耗
銀二萬一千七百六十三兩零外不在丁田徵解共徵
正耗銀九百九十三兩零又徵麥四十一石七斗零實
徵本色米一千二十五石六斗零內兌漕共正耗米七
百五十七石五斗零常平倉實存米一千七百八十四

石一斗零又存小麥七千七百一十四石三斗零社倉
無存學田二頃二十八畝零應徵銀六兩零歲入學額
二十名防禦則泗州管之千總駐焉州設民壯五十名
驛站夫馬工料銀一百九十二兩零設官知州一員繁
疲難要缺駐雙溝州同一員駐半城鎮州判一員學正
訓導各一員吏目一員歸併舊虹縣常額當差人丁併
優免餘丁共四千一百七十八丁實在熟田一千二百
四頃二十一畝零丁田共徵正耗銀七千九百二兩零
外不在丁田徵解共徵正耗銀八兩零實徵本色米九

百三十三石一斗零又徵麥六百九石七斗零常平倉
米一百六十二石一斗零又麥一千六百三十四石三
斗零社倉無存學田一十頃五十畝應徵銀八十兩零
夫馬工料銀六十三兩零

盱眙縣

秦置盱眙縣漢屬臨淮郡爲都尉治後漢屬下邳國晉太康元年于縣置臨淮郡永嘉後郡縣俱廢義熙七年復置盱眙郡屬南兖州宋元嘉二十八年嘗徙南兖州治此三十年州罷齊亦曰盱眙郡仍置盱眙縣建元四年移北兖州治此後魏亦曰盱眙郡屬淮州陳置北譙州尋廢隋開皇初郡廢屬江都郡唐武德四年于縣置西楚州置總管府八年州廢屬楚州光宅初改縣曰建中後復故建中二年改屬泗州五代時屬楚州宋乾德

元年仍屬泗州後爲州治建炎二年升爲招信軍四年復爲盱眙縣改屬濠州紹興二年還屬泗州十一年屬天長軍十二年復升爲招信軍屬淮南東路元至元十四年立招信路總管府十五年改臨淮府二十七年罷臨淮府復爲盱眙縣屬泗州明仍屬泗州

本朝因之縣治在州東南一百六十里距省九百里東西距二百十里南北距一百二十一里東九十里至蔣家集天長縣界西一百二十里至愛棠集鳳陽府臨淮縣界南一百二十里至自來橋滁州來安縣界北一里

至淮河中本州界縣古有城小而堅有六門宋嘉定十一年修盱眙軍城阻山帶河明永樂間圯今北門尙存名曰淮汴邑因山立治俯視原隰南通江表北據淮流左顧楊潤右瞻濠壽誠要衝也第一山縣治在焉宋自京師至汴口並無山惟隔淮有此故名有米芾書第一山三大字與縣署相對者曰清風山下爲玻璃泉清冽瑩澈米芾詩鑿破玻璃引碧泉因取名臺子山上龜山距城一里由上龜山而南爲望州山周三里距城五里石牛山距城十里九頭山山有九邱故名周十里距城

三十五里折而西爲牧羊山相傳龍女牧羊柳毅傳書卽此周八里距城八十里有清平山紅廟山距城九十里明光山明太祖降生處常見五色雲氣故名周四里距城一百里石門山距城一百二十里三台山三山鼎立如品字周五里距城一百五十里折而南爲嘉山周五里距城一百五十里治東有東山距城三里上有石洞左曰靈關右曰劔壁洞中曲折相通夔非凡境義井山周五里距城二十里又東南有黃煉山周四里距城三十里蓮塘山距城五十里再南有都梁山山多蘭草

俗謂蘭爲都梁故名隋曾于此建都梁宮距城七十里稍東爲平源山距城六十里平源之北爲雲山周七里距城七十里一名東陽山林壑秀美爲邑佳勝縣治東南之山盡于此治東北有軍山相傳鄧艾于此屯兵周五里距城六里右爲半邊山左爲長圍山周四里距城七里再北爲斗山以下瞰淮河陡峻故名極東北爲下龜山距城三十里上有絕壁下有重淵嶽瀆經云禹治水獲淮渦水神巫支祁形如獼猴力逾九象鎖於龜山足淮水乃安唐永泰中李湯以牛五十引鎖出之鎖末

有一青猿高丈許復拽牛沒水山寺後有井俗傳鎖巫支祁於井內治西有寶積山周二里距城三里打石山距城二十里稍南有官莊山距城三十里青山則在縣治之極西迤而北又有女山踞女山湖之南女山之西有紫陽山周六里距城一百里北又有浮山亦名臨淮山寰宇記云在濠州東九十五里俯臨長淮山下有穴淮水泛溢其水卽高水減卽退濠梁志云浮山洞夏潦不能沒而冬不加高故人疑其浮也梁天監中曾築堰於此以灌壽陽名浮山堰水則淮水在縣北二里與泗

州中流分界自五河縣流入境東百五十里至清河口
合於黃流入海城北有長沙洲長二里淮水泛濫賴以
捍禦又縣北三十里有洪澤浦舊名破釜塘鄧艾立白
水塘與破釜相連開水門入水以灌田其後隋煬帝幸
江都路過此久旱遇雨遂改今名常額當差人丁共一
萬八千二百八十九丁據嘉慶二十四年冊報滋生人
丁閤縣土著男婦大小民屯人丁五十萬七千八百五
十四丁口實在田一千二百頃二十九畝零丁田共徵
正耗銀二萬四千四百八十九兩零外不在丁田徵解

共徵正耗銀七百七兩零又徵米一十六石四斗又徵
麥三石九斗零實徵米三千五百四十石八斗零內兌
漕共正耗米三千五十三石七斗零常平倉實存穀三
萬五百二十八石零社倉無存學田一十四畝零應徵
銀四兩歲入學額十六名防禦則泗州營之都司駐焉
縣設民壯五十名驛站夫馬工料銀一百五十三兩零
設官知縣一員疲難中缺教諭訓導各一員典史一員

天長縣

縣自秦置東陽縣漢屬臨淮郡後漢屬下邳國後改屬廣陵郡晉仍屬臨淮郡東晉省劉宋僑置南沛郡及沛縣蕭齊因之梁改置涇城東陽二郡兼置涇州陳廢州并二郡爲沛郡周改郡縣俱曰石梁隋初郡廢大業初改縣曰永福屬江都郡唐初縣廢武德七年重置石梁縣貞觀初省入六合縣天寶初割江都六合高郵三縣地置千秋縣屬揚州七載改曰天長五代南唐昇元六年于縣置建武軍周顯德四年改置雄州宋初州廢改

皖省志畧

卷四

五十三

曰天長軍至道二年軍廢以縣屬揚州建炎初仍爲天長軍紹興初復爲縣十一年復升軍明年仍復爲縣改屬招信軍元屬泗州治明不改

本朝因之縣治在州東南三百三十里距省八百里東西距九十里南北距九十里東四十五里至泰欄鎮揚州府江都縣界西四十五里至議澗鎮盱眙縣界南四十五里至瓜蔓舖江寧府六合縣界北四十五里至銅城鎮揚州府寶應縣界縣舊有土城明嘉靖三十六年知縣黃泰然甃磚周五里二百九十二步有奇門四各

有樓東西有月城環城有池深廣俱二丈萬歷崇正間
屢葺

本朝乾隆二十一年重修其地南近大江北近淮泗東
接長挺西倚覆釜平疇蕩蕩極目無際重湖陂澤渺漭
相連亦淮南之要區也治之南有冶山傳爲吳鑄兵處
陟其巔可挹江南諸峯上有天井白龍池鐵牛洞眞珠
泉諸勝周三十里高八十丈距城四十五里稍東有橫
山周十五里高四丈距城五十里山形望之若橫故名
上有泉不竭山南有踟躕山相傳陳荀朗破郭元建地

與六合儀徵界治之西南有浮山山時出雲望之若浮
上有介之推廟周五里高二十丈距城三十里又西有
覆釜山周世宗征南駐驛于此周五里高三十丈距城
五十里產石黑而礪接來安界城之中有琉璃井津液
凝結瓷甃之上狀如琉璃治西南有白楊河源出浮山
卽今之城防河其流原灌邑之城濠今上流多壅矣西
有汭澗澗源出覆釜山三汭合流東有渭水河又東有
秦蘭河源出橫山至秦蘭而始勝舟楫西北有銅城河
受銅城諸水入于丁溪湖得勝河西入汭澗河東入高

郵湖漢高祖擊淮南王英布獲勝于此又五湖在縣東北四十五里以五水合一而名東接高郵之毗沙湖劔岡湖在縣北四十里東接五湖又有丁溪湖在縣東四十五里亦與五湖相灌注萬歲湖在縣西五里周十里相傳秦始皇經此因名按境內有三十六陂宋蔣之奇轉運淮南時值歲飢乃募民以興水利役興而飢民賑陂成而農民利仁政之大者也今歲久湮沒常額當差併優免餘丁共一萬二千一百二十九丁據嘉慶二十四年冊報滋生人丁閤縣土著男婦大小民屯人丁三

十九萬八千二百七十一丁口實在田地七百九十五頃四十一畝零丁田共徵正耗銀二萬八千一百八十八兩零外不在丁田徵解共徵正耗銀二百四十七兩零實徵本色米二千四百七十石八斗零又徵麥一百八十二石八斗零內兌漕共正耗米二千三百三十五石零常平倉實存穀三萬八百三十八石三斗零社倉實存穀一千二百十五石二斗零學田二十六畝零應徵銀一十六兩歲入學額十六名防禦則泗州營之把總駐焉縣設民壯二十三名驛站夫馬工料銀二百六

兩零設官知縣一員疲難中缺教諭訓導各一員城門
鄉巡檢一員典史一員

皖省志畧

卷四

五十六

五河縣

縣自漢置虹縣屬沛郡後漢晉因之劉宋省唐武德四年復置虹縣屬仁州貞觀八年州廢縣徙宋初爲泗州五河口端平二年金亡遺民來歸置隘使屯田咸淳七年置淮安軍兼置五河縣爲治元初軍廢屬招信軍至元十七年改屬泗州明洪武初屬鳳陽府

本朝雍正三年改屬泗州縣治在州南三十里距省八百里東西距一百里南北距一百十里東三十里至浮山本州及盱眙縣界西七十里至順河集鳳陽府靈璧

皖省志畧

卷四

五十七

縣界南七十里至浮榴鳳陽臨淮二縣界北四十里至界溝集本州界縣舊有土城爲淮水所圮嘉靖中知縣高珍始建磚城周四里門四各有樓池深一丈五尺濶三丈六尺

本朝順治九年康熙二十二年屢修乾隆十九年重修邑東帶淮潼西環澮水南抱滎流北連沱派五河交會舟楫往來南北要衝之地縣治南有金岡山形勢聳秀周一百丈距城二里又有九岡崇岡綿亘巨坡中斷土人謂九岡八窪距城三里九岡之西爲翠栢山昔因叢

柏挺秀而名今爲黃水衝沒矣距城六里西南有卧龍山下有龍潭故名距城七里東則有鐵鎖嶺介于泗州五河之間橫跨海口爲五河之捍門云水則澮河在縣東南二里其上流自河南永城縣流經宿州界又東南入縣界經縣治南入於淮或謂之渙水蓋渙水與澮水合流也今水漲沙淤徙於北澮沱河在縣治西北一里源出宿州東南之紫亭河歷靈壁虹縣流入境又東南入於淮滎河在縣治東南二里縣南一里有南河匯衆流而成河爲滎河亦東流入於淮潼河在縣東北四十

里源出虹縣羊城湖經縣東北二里通於沱河東流入淮以上四水並淮爲五河志云五河交會處在縣東二里謂之五河口志又云淮水在縣東一里入境縣東南一里有金剛嘴形長而銳爲淮壩之障蔽云又按滎河入淮之口有南湖其上流雖有王莊湖及小河赤龍一帶之水然歲旱則皆可耕之田南湖之尾爲蔣家壩卽入淮之口作隄以障淮者歲潦内外水皆至則田成巨浸若内水不至湖可全耕獲康熙時知縣鄭鼐修南湖壩由此内無水而下田利内有水而高田亦利焉常額

當差人丁併優免餘丁共二千四百七丁據嘉慶二十四年冊報滋生人口閭縣土著男婦大小民屯人丁二十萬四千一百九十九丁口實在熟田地七百五十二頃二十八畝零丁田共徵正耗銀六千五百八十九兩外不在丁田征解共徵正耗銀七十七兩零實徵本色麥三百一十八石三斗零徵本色米九百一十四石二斗零內兌漕共正耗米六百九十九石七斗零常平倉實存穀五千一百三十石九斗零又存米二石零又存小麥一千七百五十五石九斗零社倉實存麥四百二

十七石三斗零又存穀一百九十九石一斗零學田無歲入學額十二名防禦則有泗州營之把總駐縣治焉縣設民壯二十二名設官知縣一員疲簡缺教諭訓導各一員典史一員

右皖省志略凡四卷初編時欲以通省之營伍關榷漕
運鹽法纂爲專門先以各屬之鹽引鹽價詢諸掌吏各
縣所呈報例不畫一且不備鹽道爲專政駐劄江寧囑
其查核以遠在隔境亦未得時聞張劔泉侍御
名銘揚州人
時方里居札以詢之開單見示秩如也以徽郡及六屬
食浙鹽宿州食蘆東鹽亦不能詳晰欲以附入各屬緣
體例不純遂從闕如余旋亦別皖去矣淮南北鹽行銷
六省而廣陵實爲滙總之區余嘗小住其地聞鹽之銷
於皖省滯岸頗多滁泗之間致有虛岸無商者其課程

皖省志畧

附錄

一

大爲通局之累及游皖稍詢其顛末則知江以北苦於
販私之梟而緣江則苦於售私之回空糧艘泗州以洪
澤湖爲界東通淮海淮北鹽之行於鳳潁光汝者由是
達淮以往而鹽徒亦遂附舶混跡相爲黨援難於究詰
楚南北及江右回空之糧艘均自和州入皖境經行幾
千里以達其水次開江迤後乘風便空重運官俱無從
約束之於是結幫停泊公然售私地方兵役少則彼抗
然不服驅逐或汛弁巡司往查則又挂帆颺去終莫能
誰何也由是江南北私鹽充斥而官引滯銷矣愚謂禁

止梟徒固在嚴查過境之梟尤重於詰捕本境之梟其本境之梟不必捕之於成羣結黨之時而在密緝之於閭里潛藏之日蓋外境之梟非得本境梟匪爲之導引護送則亦不敢公然肆行而游手之氓一入梟黨則里長鄰佑無不指目特以外梟爲羽翼則黨衆勢盛法當嚴責里長居民如村堡有此類者則密行指報如有諱匿俾之連坐官則遣役偵探俟其歲時休息子身竄歸則立爲掩捕置之於法再外梟入境其食宿之地卽其窩頓之地訪執食宿外梟之人卽治以窩頓私鹽之罪

如此則梟匪旣引送無人又食宿無地而兵役復時出而掩捕之其勢有解散者與庚辰秋冬之間制撫交牒指名嚴捕泗州盱眙鳳陽等處緝獲甚夥而若輩頓爲潛踪此其明驗也至糧艘夾帶則不必詰售私者惟在嚴禁買食者余少時曾附漕艘至江右見售私之所每在空濶寫絕人跡稀少之地一遇停舟則附近里人不期而會者若市然有囊負肩擔者又有攜重貲筐筥纍纍而售者卽間有兵役至彼亦惟熟視而去法當於未回空之前當事者檄查向來停船售私之地凡若干

處如沿江之六百丈三江口針魚嘴王家套皆是向有卡房與否額設汛兵若干名附近某營某巡司俟空船將屆入境卽檄營添兵幾名巡司弓兵幾名該管縣捕快幾名量加賞勞俾其搭棚棲止又以附近丞簿各員專司其事於船之停住者不必訶禁但飭兵役於各路口巡緝有負鹽數十斤者卽加截畱或有筐筥纍纍者則探明窩頓之處報縣起獲又明張示諭申明私鹽之禁其有犯者許平人截取紐稟卽以其鹽充賞則糧艘雖宿畱旬日減價求售孰肯冒禁而來於官則受兵役

之訶逐於私又受同類之劫奪哉船之丁舵必舍此地而前進而前路復然明歲必棄故地而圖新而兵役亦隨時移置則向之利市今歸折閱冒風濤千法網而無絲毫之益其不待禁而自絕也明已將見滯岸皆獲蝸銷而課程永無賠累語曰有治人無治法愚謂必治法先具而後可責之治人也謹抒管見以質諸當事之諸君子又劔泉侍御所寄引數銷價清目適在行笥恐其佚去并錄於左綱齋甫附識

行銷淮南綱鹽五萬一千九引每觔官價三分八厘五毫

內
桐城縣

行銷淮北綱鹽五千二百八十六併引每觔官價四分二厘

徽州府屬

係行銷浙鹽引數售價淮南無案可稽

寧國府屬

行銷淮南食鹽九萬六千五百引九折實行八萬

皖省志畧

附錄

四

六千八百五十引每觔官價二分九厘

池州府屬

行銷淮南食鹽二萬四千四百十八引每觔官價三分三厘

太平府屬

行銷淮南食鹽一萬九千四百七十引每觔官價三分

廬州府屬

行銷淮北綱鹽二萬八千五百五十八併引每觔

官價四分一厘九毫零

鳳陽府屬

行銷淮北綱鹽二萬二千六百九十七併引半每

勛官價四分一二厘零

內
宿州

不食淮南北之鹽應食何處引鹽淮南無案可稽

按宿州附近徐州應食長蘆鹽

潁州府屬

行銷淮北綱鹽一萬六千九百九十五併引半每

皖省志畧

附錄

五

勛官價四分一二毫零

廣德直隸州併屬

不食淮南淮北之鹽應食何處引鹽淮南無案可

稽按廣德與浙江毗連應食浙鹽

滁州直隸州併屬

行銷淮北綱鹽三千二百八十八引每勛官價四

分一厘二毫零

內
全椒縣

行銷淮南食鹽七千五百十五引每勛官價三分

三厘零

和州直隸州併屬

行銷淮南食鹽一萬七千四百七十八引每觔官

價三分一厘

六安直隸州併屬

行銷淮北綱鹽一萬六百二十七併引每觔官價

四分一厘二毫零

泗州直隸州併屬

行銷淮北綱鹽八千八百十五併引每觔官價三

皖省志畧

附錄

六

分五厘二毫零